

神碑道

明仁懷知縣 勅贈徵仕郎翰林院簡討王公神道碑文

明懷宗朝
大學士 黃景昉
晉江人

兩漢人最尚經術守師說其以經明行修著賢往往高自標題不樂仕宦久之跡愈遠道愈尊則有羔鴈盈階台衡遜席至儼然當人主賓師之禮若迺身兼數器智守一官老吏咸驚聾丞弗廢所著爲循良**悃**幅之頌又有可稱者是故瞽宗閭長周官既兼識其名循吏儒林漢史亦兩傳其事良以才德分馳道非一致以余所聞今仁懷令王瑞庭先生蓋異是焉先生諱所用字乃玉世爲晉保德州人州故邊鄙代鮮望流苞塞之祥實首發自先生爰自生而能靈弱不好弄長年負笈屢試舉固已慨然有未墜在茲之意矣居恆歎河汾中說河津思錄並披榛理窟淬刃儒礪晉故士國也豈其侈河山之險徒以漁鹽齒草爲辭爾乃寤寐笙簧崎嶇墳典借桴關**雒**漱泚文義往往揭其精華形諸教授圓冠方領之流束帛承筐之彥蓋日就精廬問

保德州志

卷十二 藝文下

一

道者不可以數計己先生玉色常溫金聲屢奏恆歌兔首鮮撤臯北而復拯彼顛連資之婚宦學中都養至以下坐爲尊塞外兜鍪時亦投戈見詣會有詔徙郡國高才生入隸辟雍先生爲一推擇行既還自京師惠問逾流徵書狎至杜門講誦意泊如也諸生徒頗以遲暮爲諷咸謂駒滯空谷匪無維繫之思雀銜講堂將有升騰之兆勸駕更端熟視未答久之乃強起除蜀仁懷令地故闢自播州夷漢雜處入我版圖甫及匝歲先生日窮通時也崇痺遇也蠻貊可行先師詎欺我哉諸如田陌橫縱街術廣斂官師飲射之儀廟社塗丹之制先生咸誅茅作叢畫地成圖號集農商功同草昧煦濡釋媼禮絕釣鍰居五年政化翔洽久之忽投劾去先生固自稱勞臣之誼急病讓夷儒者成親流行坎止况室亡菜婦簞有韋經頭顱可知齋塾無恙豈必乘生耳之車遠放諸奇肱之國哉時淑配盛孺人驟卒夫人孝敬勤慈稱耦德焉有子日邵少負奇風氣遵上先生固特用菜婦韋經爲况云歸田之後躬理舊業千子時過嘯吟罔間凡優游十有三載終於正寢經三日容色復睟觀者歎異諸生徒皆爲

服乃至百里罷番千人會葬題碑比絹特高烏闕之封酌酒如泥通下馬陵之拜所謂幽人貞吉聖世美譚者乎其後邵果陽僑菽壇拜官史館遍裝遺像仍拭堅珉因謬以碑文見屬夫碑者所以悲往哲勵來茲也義兼激勸詞矢孤嚴今將躋先生於田何伏鄭之班使前賢有知徙倚徬徨猶以吏事非精爲愧不則讚先生以卓魯龔黃之業而俗吏所長薄書筐篋復以經學寡逮爲譏惟是宣尼垂教舊傳筦爾之音即復老氏崇虛不乏猶兮之畏因之刀割武城籥通函谷南方見月千載發其精華西城流沙一經弘爲道德余愧無以表先生也其將表之言游尹喜之間也乎太史君勳德初隆嗣將有大書特書之錫焉不揣謏劣姑以佐周官漢史之所未詳爾矣

白靜遠神道碑銘

本朝進士巡撫 賈鳴璽

嗚呼靜遠先生既沒之二十有二年而曲沃賈鳴璽爲書其墓隧之碑曰先生姓白氏諱眉靜遠其字學者稱奇觀先生山西保德州人也少積學有聲諸生間戊子以學使試第一充拔貢生辛卯考授通判明年改選沂衛經歷會缺裁戍戍補無錫丞

保德州志

卷十二 藝文下

二

庚子遷彰德府同知攝武安再攝安陽壬寅解組賦歸二十餘年卒於家其在無錫也鄉大夫秦君鉞嘗璃辭頌之曰不怠日不墨日不任察不任威日不任衿不任緩日不任德不任譽說者以爲詞煩而不殺文人之侈耳乃吾觀留棠集中里排殷析雷若干人謁御史馬而有請也其略曰無錫故征白糧一石羨二斗四升計一歲實浮二千石有奇檠檠小民罹此毒痛維我縣丞白毅然釐剔庸活我小民我小民竊懼如白者世無兩願鑄諸石以爲後來法馬下推官鞏某知縣黃某核覆而吾嘗疑之惟正之供載在王制久矣何羨之云羨借耗之名者也雖然誰爲耗者則亦借耗之名者也而推其漸將耗吾民盡終歲勤動之所獲不足當稅外之稅可奈何而究其極並耗吾國縣官一旦有軍實諸大事問閭閻之蓋藏已在有司者橐中無以應矣可奈何今世之爲耗者不獨白糧爲然此其可長太息者也且先生家故貧嘗當壚以養其親其在沂高臥老屋中獨一老蒼頭侍左右而視清冽之惠水如貪泉然君子以爲難其後於武安於安陽手不名一錢歸自彰德時行李蕭蕭圖書數卷蓋

其淡泊明志者素也善夫黃與鞏之核覆日白縣丞者表表十五府二十五州縣中又曰圖義不圖利馬則騰諸薦剡日佐貳中翹楚夫乃信鄉者秦之說匪侈也蓋廉吏之可爲如此或曰先生之去彰德也以安陽盜故夫盜則後先生者之責而坐先生後先生者長跪願受過以脫先生先生不許慰諭而遣之可以觀其度或曰先生嘗過木瓜園得遺金坐待其人擲之去可以觀其節或曰先生固急病讓夷者鄉人某之孤遭仇者阱陷幾殆則奮袂直其事至對簿不辭可以觀其義凡此雖丈夫之高行然於先生爲細節不足爲先生重而獨是當賦法之壞也尚有先生其人者爬搔弊竇以長養元氣而成保泰之嘉猷願不偉與故大書 俾當世得以覽觀焉按譜牒先生高祖考歲進士鳴之公諱珮曾祖考長公諱鳳翔祖考養礪公諱天粹考封君文學憲樞公諱敬□累世以惇樸直諒聞憲樞公配賈宜人生先生於萬曆甲寅之十月十八日其卒也在今康熙壬戌二月二日享壽六十有九配張宜人繼康宜人男一君琳拔貢生侯銓教諭孫男六曾孫男二皆能振其家聲云銘日

保德州志

卷十二 藝文下

三

若稽太傅名高三唐苗裔在此蘇海韓潮自仙賀鬼文壇牛耳聿遊聖門載觀帝座聲聞鵲起蒼生望殷聊試哦松臣心如水誰借天厨飽厥貪壑慨然已矣錫山峨峨惠泉湯湯人歌樂只乃倅鄴下旁攝巖城化行俗美拂衣歸來露柳霜菊柴桑之里福履考終箕尾斯騎天門至止風清月白一夢千秋庸告諄史

墓表

王瑞庭先生暨配盛孺人墓表

明大 黃道周 福建 學士 人

自東漢而降學不純師士博依講肆如市迨明興以經文射的稍稍尊其本業然自鄉塾負墻而外率踔去不稱先生其稱先生者廣文委貌耳里居蟠首無復橋大人豈道博不專抑士多通數徙難服耶以予所聞前輩有敬齋康齋諸先生皆擁臯比立里門稱大師負經逐畔恆百數十人然未嘗一日坐堂皇御百姓如桂陽晉城時雖載元纁列廊序於周程自視瞳如也予在都門見王太史邵稱其先君瑞庭先生世讀書淵源濂洛自爲諸生時輒奮然以斯文爲任問掇匏葉習俎豆翦蒿萊射兔

首多士從者垣如堵墻猶自以爲端居束修不覩割割之用疑拂鐘之無斷也時時爲諸弟子賑貧之理婚娶垂杖推車意色穆如又自以郡城隣塞築土可鑿也議瓷以石當道難之公爲計丈尺召工徒指畫成就不爽圭黍城成敵至蕩蕩輒嘆息去世以是知公才也方是時年已四十餘始以選貢至成均籍甚都下旣歸益聚生徒絃誦不綴或問公平津侯與轅固生孰賢公曰平津侯如商賈善居積老折一售耳轅固生良農薦菘有秋吾亦農耳或勸公仕公曰曾參仕莒豈必賢於閔子及二人歿久之乃謁選嗚呼士君子讀書過數卷慕宦如梅奔走一官動以親養藉口或守闕不歸臯魚所爲興歎也誰復湛定如先生者旣謁選得蜀仁懷令仁懷故播州楊酋新雍甫年餘夷漢雜居服貳靡常衆咸患之公曰患無行蠻貊者耳吾以試呂梁之水公至乃闢荆棘創學宮擇民間子可教者授經書提命之爲因俗更化去太甚分田均產鬻訟乃息又值有採木之役公授工直命山左自募徐致之如湧於川亡何盛孺人卒孺人生惠而莊事姑甚孝自微時姑恆以夫人呼之初至仁懷僮姁見

保德州志

卷十二 藝文下

四

荒徼邸署新立相顧飲涕孺人正色曰朝廷不薄遠彝汝輩顧薄縣令耶公旣失孺人乃益思歸移牒乞休者至再當事方睠倚新疆遺黎戀其樂豈相抱持至五載且遷矣卒以無奧援畀王官去比歲餘百姓有從萬里致去思碑者世以是誦公之良也公歸益理舊業授經課士如前時又值文廟圯董師儒鼎新之士以是益競勵連茹徵泰矣里居十三載絕徑郡庭時携一編坐嘯行吟或進諸弟子道古爲樂顏其齋曰于徐軒此其意於紫芝于蔦奚讓乎先生諱所用字乃玉山西保德州人其先有學博奇別駕鼂皆以清惠者六世至公以子邵貴益大稱興門云公仕不過郎令壽未躋耆而所著作甚富卒之後五月復睟諸弟子皆爲服就位如禮此自齊魯罕觀者

史氏周曰經學之替也微濂洛則昌黎師說亦爲妄作矣王先生起於邊郡倡儒服行修言從以區區仁懷比於桂陽晉城之化及於史邵砥勵侃然有先正之風非其世德源瀾而然乎視馬扶風戴九江綴經書行售自汰者何貽厥之渺也聞其先兆

有瓜瓞之祥視於陶鶴予素欲歷邊郡備覩要塞今老矣不復能過而題其墓因爲表之使後之史者不以循吏駕於儒學之上

墓誌銘

姜崑鬱先生墓誌銘

仇兆鰲

浙江人

吾友姜崑鬱先生既歿之三年其孤弘焯將於丙戌年十一月庚子初六日庚申葬公於西山之陽乞銘於余余不敏不工於碑版文字然與公爲同年友交最深知公居官立朝大節卓卓可觀又督學時大有造於吾浙皆宜見於紀載是烏可以不銘公姓姜諱櫛字仲端號峴鬱上世江南山陽人祖諱三公洪武間以武功守禦山西遂家於官占籍於保德州大父諱名武天啓間武進士官都督僉事鎮保定流寇圍汴孤軍血戰馬賊不屈而死贈廕有加考諱宗目順治己亥進士授濰縣令未之任而卒夫根之茂者其實遂源之遠者其流長姜氏世傳忠義積功累行數代而未大顯天必昌其後宜乎扶輿磅礴之氣獨鐘於公也公少英敏讀書曉暢大義不屑屑

保德州志

卷十二 藝文下

五

章句爲文章出入經史有典有則戊午舉於鄉乙丑成進士好與名士遊一時文望重於都不諸公貴人爭欲與之交遂橐筆叅文幕大江南地之士悉荷品題其所甲乙纖毫畢當蓋公未仕時已有功於文教云壬申授麻城令乙亥以卓薦入爲行人丁丑擢戶垣給事中己卯典江南試內陞鴻臚鄉督浙江學政癸未擢僉憲再擢副憲甲申轉少司空隨攝少司寇事晉秩少宰蓋自壬申迄甲申十三年間以縣尹而至卿貳誠異數也時承平日久海宇又安大寮以養望爲尊小吏束於文網脂韋腠腆苟幸無罪天子加意振刷思得公忠練達者以表率僚屬整飭紀綱惟公老成端慤足以當之上方將大展其用而天奪之速遽致不起嗚呼可哀也已公宰麻邑省追呼嚴保甲繕城垣興教化杜苞苴恤商旅麻人至今思之爲諫垣條奏獻替切中時弊皆奉俞旨任司空稽察錢弊無遁情蓋公之公忠練達以實心行實政所至不苟如此至於興文教作人才尤毅然以爲己任分校楚闡典試江南所得皆名宿其文迥絕流俗其視學吾浙也浙文習尚華靡公以清真高古起其衰弊振興

士氣禁州邑吏凌侮諸生又訪忠臣烈士之裔而優恤獎拔之其入彀者皆已欣欣向榮即不中選者亦皆嘆息愧悔而心無所怨三年中目覽手批焚膏繼晷兩浙文風翕然丕變而公之鬚髮頓白精神至此大耗矣初膺脾疾甲申遂大漸 上遣御醫調攝恩遇有殊公亦感激涕零而宿疾已成猝不見效公儀容魁傑日光如岩下電吏民見之無不懾服平居誠懇篤摯議論簡要不繁而定大事決大疑侃侃無所瞻徇其經濟擘畫確乎可見之施行易箚時神色如常蓋得之學問涵養者深矣惜乎始任司空而已病晉少宰六日而即歿假令天假之年竟其生平之蘊蓄其所設施豈僅如是哉次年仲春曾於內殿語及故少宰 皇上猶爲之動容太息惜大才之不盡其用也公生於順治丁亥六月二十七日歿於康熙甲申十月二十二日享年五十八歲癸未 覃恩誥授中憲大夫待贈通議大夫元配李繼配薛先公而歿俱誥贈恭人繼配呂生子弘焯幼而穎慧能讀公遺書云

銘曰姜氏受姓居淮之旁武功載績遷於晉陽赫赫乃祖捐軀勤王保世滋大至公

保德州志

卷十二 藝文下

六

而昌直中方外玉質金相有文在手抵掌生香茂宰撫字垣掖風霜簡在帝衷股肱動勸所謂伊人邦家之光胡天不吊朝野失毗涕泗浪浪公之靈爽何間存亡有筆在史有祀在鄉君子之澤積厚流長公亦有子繼序其皇芙蓉阡立華表鶴翔億萬斯年永安其藏

懷遠縣知縣劉公墓誌辭

姜 櫛

本州人

康熙癸未六月余自視學兩浙歸來省先人墓適遇述菴劉公以病捐館舍余往哭之其昆仲以公歸窀有日諄諄以隧道石請余誌焉余與公居同城知公且悉其何辭公諱祖舜字允恭號述菴先世爵里遠不及考高祖宗常省祭官曾祖啓光庠生祖步階庠生中武科鄉試父三顧廩於庠娶陝西府谷縣李氏繼娶王氏是爲公母兄祖堯丙子歲貢弟承堯武生述堯廩生祖黃醫生公行二生而穎異狀貌魁梧吐音宏亮性恬靜無他嗜好讀書刻苦率以堅忍成其所志十六歲受知學使錢公冠童子試食餼于庠家貧授徒自給州中知名士多所成就己酉舉於鄉壬戌計偕遂

捷春官成進士未選乙丑大司寇庸齋魏先生委贊聘焉孝廉學謚魏君詞林暄享李君皆公所陶成所著有我說心統性情圖說問心錄言行錄四書集義禮記集義若干卷藏於家其在蔚州日與庸齋先生講論性命之學夜分不倦先生叙公集推公理學醇儒士林以爲知人云己巳授懷遠知縣懷遠僻疲多搖稱難治公因俗布化三年政成庚午上官檄公同考所拔慶得人公幼有腿疾雅能攝生不以病病念老母在堂決意就養癸酉以病告歸宦况蕭然晏如也抵里杜門經營數楹聊蔽風雨所置薄田僅供口粥日唯以濂洛關閩諸書自娛旁及釋氏經典奧義妙旨無不窮研會通優游數年任運終老屬口之夕精明洞徹性天不亂曰香山所謂外以儒行修其身內以釋教治其心者公其儔與公生於明崇禎十六年五月二十九日午時卒於清康熙四十二年六月初一日巳時享年六十二歲元配閻氏貢生宏知女男二長枚娶郭氏次相幼未聘女二一歸庠生王愷子王省歲一歸庠廩生薛廷魁以今十有一月朔葬於城西南之新阡

保德州志

卷十二 藝文下

七

銘曰連峯聳秀黃河汪洋篤生哲人手持天章秋空一戰講堂傳經洪纖百川導爾滄溟策猷漢殿彈琴栽花襉灑雨露芄芃桑麻迺賦遂初白髯紅頰還彼鴻濛儼然觀化長松蔭丘白雲在野鑄我蕪辭庸告來者

文

改正聖賢章服文

見名宦 周山

仰惟 聖賢斯道攸寓師表百王教化萬世保德學宮建於陞地巍巍廟貌金碧輝麗堂堂儀象章服殊制衣裳無緣黼黻未備揆厥所由仍元宿弊朔望拜謁曷尊瞻視茲特諏吉表正更去釋菜禮行庸伸愚意敢告

祈雨祭城隍文

周山

神處幽冥之中鎮奠四境予奉朝廷之命來守一州各有職事合宜自盡鋤強扶弱興利除害使盜賊息而刁頑化田野闢而貢賦完予之職也若捍災救患福善禍淫使風雨調而土地潤五穀熟而人民育獨非神之職乎神之職若不盡予之職若不

修則神不得以血食予不得以祿食有負天地生民之心有孤朝廷養民之意神與予心能安耶忍耶茲特謹備時食香緇祇告於神神其箋於 玉帝早賜甘霖以慰民望則神之職始盡而予之心始安矣敢告

謝雨祭風雲雷雨山川社稷城隍文

周山

成湯大望尚禱雨於桑林之野周宣賢主亦憂旱而歌雲漢之詩况山任守專城職司民牧顧天道之亢暘見農民之憂懼烏可坐視而愒然耶先於四月初旬籲天禱聖請水祈神已蒙沾濡之澤未遂優渥之願或爾疆潤而此界焦或東鄉晴而西鄉雨少舒抱甕之勞者有之猶受灌園之苦者有之有時雲欲幕天而風吹散有時雨將洒地而風捲空山今再祈神隨有感禮始舉於清曉雨即降於黃皆通宵如注達旦纔晴精神是格區區之非德何堪動植皆蘇蕩蕩之洪恩莫報輒陳微禮用謝無私更冀多黍多稌在在獲大有之年無災無害人人樂太平之日謹謝

祈晴祭城隍文

保德州志

卷十二 藝文下

八

欽奉 上命來守此州關生民之休戚係杜稷之安危心切憂惶職恐鰥曠照得本州春夏以來雨澤少降曾叩籲乎羣神蒙溥降乎甘澍粃麥頗收豈黍已種茲當收成之期乃有淫雨之作夜焉而寐厭聽滴堦之聲朝焉而興忍觀衝河之浪稼穡傷於巨浸川陸變為滄海民間之房屋固多塌塌官府之廡宇亦有傾頽僚以之嗟嘆老幼以之憂愁所以然者由我失牧民之職耳我若怠政奸貪治民酷虐寧使我躬之受譴莫貽庶民之罹災今率官吏生員里老人等恭詣神祠特與神告惟冀上達 玉帝下憫生民移檄雨師頓收黑雲於四野傳宣 馭隨揭紅日於中天少雨多晴式慰三農之望無風有日端期五穀之成上可以輸國稅下可以足民財是實藉神之休庶幾遂我之願謹備酒殽庸伸拜獻

祈雨告社稷文

周山

惟神粒我蒸民有功有德歲或旱潦皆憑神力幹旋造化以介黍稷山守此邦荷神陰翊撫字黎民惟慮失職戰戰兢兢勿忘朝夕顧茲今年豐凶叵測自春徂夏少降

雨澤麥苦萎黃地土龜折我與尊神同受其責今我祈禱不遑寢食密雲將雨狂風吹息瞻仰昊天曷其有極炷香稽首奠神憫惻油然沛然我心感激俾歲有秋民免喪戚敢告

祈雨告風雲電雨山川文

周山

惟神妙用玄機化生五穀四月不雨風日甚酷我率吏民拜叩懇篤雲合將雨滿期沾足狂風捲散我心頻蹙神豈以在人之敬有勤與情抑亦降人之殃而岡肯與福我拜匪諂我求匪瀆惟恐歲之無秋反貽神之有辱神與天道不疾而速覆手雨來翻手雲簇若得風雨時而土地沃庶幾五穀熟而人民育敬炷瓣香詣壇拜告

祈雨告晴文

周山

食爲民天稼穡維寶雨暘失時豐凶未保昔神賜雨稼將堅好今何淫雨致民愁潦我守此邦爲民祈禱仰神憫恤箋彼蒼昊頓掃頑陰日出杲杲若得豐年有黍有稻百室盈止可穀幼老邦家有光國賦輸早凡此之慶惟神能造

保德州志

卷十二 藝文下

九

謝晴文

周山

霖雨連旬禾稼浸漬民恐無秋實切憂懼仰叩蒼穹隨感開霽日舒陽光雲斂陰翳荷神休祥受帝明賜迄用康年載穫多積養我農民慰我官吏茲備牲醴庸伸報祭神其昭昭鑒此微意

按周公祈雨文層見疊出其一 片惓惓爲民苦腸具見之矣故悉志之

祈雨文

韓朝貢

幹旋造化變理陰陽雨暘時若惟神降祥貢承上命來守茲土罪惡多端不可指數宜自罹咎胡災民田旱魃爲虐苦不可言三旬不雨禾黍其無伏惟神明轉禍爲福步履任罪表我寸忱仰祈神龍大沛甘霖

禱雨文

胡柟

惟神幹旋造化福佑生民功烈昭昭恩德種種遠者姑不具論卽履任以來凡五閱春色矣三辰順序五穀豐登人無夭札物無疵厲間有災侵輒臻康平柟與士民

感而戴之歲時享而祀之罔敢不備罔敢不虔至柙一刑一政尤稟仰神鑒嶄完末路罔敢不公不法以觸明威奈之何三冬無雪一春不雨風霾時行寒冰不解耕種甚難麥禾無望或柙積有愆尤干天之和耶或士若民造有臯戾來天之怒耶然天以好生爲德神以庇人爲主必不以官之咎移於人必不以人之咎移於歲也况悔過自新聖賢所不棄豈惡人齋涿終不足以祀上帝哉爲此自怨自艾率北士民共修共改懇乞俯賜鑒憐早爲轉移亟返飄塵之風大沛滿犁之雨使土脉膏潤人心鼓舞帝力不虛國課不虧惟在此時耳勢急望切牲醴爰陳心懇詞殷伏惟垂譽

祭河神文

胡 柙

惟神忠烈昭於前代靈異顯於明時凡係水鄉皆尊神宣威覃德之區也維茲岩郡瀕彼河濱套夷一馬可到幸有一水爲隔夏秋汪洋足恃冬春凜冽可虞倘若滹沱水合疇能陣出背水生靈之虔劉疆園之搖蕩如世廟時事乃所必至者爲此先期致祭合誠用禱懇乞神力幹旋常使河流活潑則洪波蕩蕩那敢妄意投鞭巨浪滔

保德州志

卷十二 藝文下

十

滔自將息心飲馬一方安堵固爲皇社有靈兆姓寧居實屬厥靈不爽虜騎年年弗至食血永永無替矣

祭先師王炳藜文

明堤學御史
殉國難 陳純德 湖廣人

吁嗟天乎胡奪吾師之速也師一代偉人也師起家制科讀書中秘道德文章卓然名世天下人士無不仰之如景星卿雲恆以不出門下是懼已卯奉命遴士吾楚矢公矢慎月費神勞幾盡六千牘而披閱之不餘荆山之泣及榜發一時咸慶得人而小子德與焉且顏其文曰宣公之奏勲懇盈楮是其暗中摹索期許固已遠矣緣戒舟先歸不得偕諸弟子謁謝已而獲雋南宮蒙恩特簡按部吾師桑梓地竊計邇來巨寇灾荒民生岌岌惟是絕瞻徇以肅吏治蠲煩苛以鎮人心猶時惴惴焉恐不得當上負聖天子以貽門墻羞孟秋閱邊至鴈代師適養疴其間巡務竣瞻拜函丈匪徒執弟子禮也亦以訪政事之闕失耳吾師道德文章之外無他語止爲之復理前言日頃聞靜正執持不擾不撓喜而不寐宣公之句謬附知言矣夫宣公學術醇正

忠讜卓騫德何敢望乃吾師一遇耳提率不越此其又何敢不自勉也顧小子德吾師錄楚士中一人耳其最而進之也乃爾使假師以年應卜金甌延攬天下士則其崇獎善類以光輔中興者又可勝道哉師洵一代偉人也夫惜也遽爲騎箕之遊吁嗟天乎胡奪吾師之速也太行雲黯河汾流漸哲人其萎魂夢淒而秋陽在望後晤無期一卮遙酌心喪孔悲直抱痛熙明股肱之夷而豈獨以哭吾私尚饗

祭陳烈女文

見前 劉四端

烈哉女士剛秉坤貞蹇修雖判六禮未成重一言於既結矢九死以無生啜其泣矣遂殞厥身凌霜肝胆化石精誠雲霄抗節閨閣留馨嗚呼噫嘻死孝爲子死忠爲臣茫茫宇宙曾幾何人子然處子扶地義而植天經鬚眉師表冠冕人倫皎皎晉陽之瑞皇皇聖代之琛春秋享祀用妥厥靈榮光太史譽永丹請

以上祭文

勉學文

周山

勉爾童子勤讀詩書先入小學親友隆師日記故事時習幼儀勿可驕惰勿可遊嬉

保德州志

卷十二 藝文下

十一

勿學賭博勿蕩街衢毋得囉哞毋得潑皮爾年漸長日月如飛雞鳴而起爲善孳孳見惡當避見善當趨入孝出弟行徐坐隅謙謙自處慥慥自期誠意爲貴慎勿自欺爾能盡職天必祐之俾爾作官光耀門閭金章紫綬衣錦褰衣若不苦學曷得如斯勉爾童子切切惇惇我言切實勿以爲迂

勸農文

周山

勸爾農夫生業當勤顧茲天時維暮之春農器當備農事當詢如何芟柞如何耕耘及時播種徂彼隰畛出入息同爾比隣農業無惰家道纔殷衣食既足禮義當循修爾身體孝爾二人友爾兄弟敬爾六親和睦鄉黨恤爾宗姻教男讀書教女織紉律令弗犯刑罰免身忻逢聖世幸爲良民庶得安和俗美風淳勸爾農夫我言諄諄爾宜謹聽以全天眞

吊龜石武

王所用

龜石在山麓蹲峙亦有年相傳吃着水斗米值三錢今爾遭河變上瀾山徑下擁園

龜石汨沒渺無踪桑田井龜幾多更小民處癩病爾亦被其侵昔聞龜石若爲祥斗米三錢在在揚不知龜石潛刑后荒沙極目總堪傷龜哉龜哉稱靈物爾今存亡胡未卜想來造物定於中雖欲逃之不可獲獨不見磨劍石昔在鬻墻岩壁立伯當武勇世稱雄揮戈躍武知何日又不見臥龍石昔日虬盤堂左屹於今活潑在泮林歲歲科科競起蟄古今興廢亦何常世變江河不可量君子硜硜寧抱璞礲礲瓦礫枉奔忙吁嗟龜石今何得千載令人常嘆息

詩

吊古示州中學者

元肅政廉
訪司僉事 李述祖

我行河之滸我陟山之巔跋涉豈殊途無勞怨獨賢懍懍踏崩崖惴惴臨深淵安危擊馬足戈矛興目前投漿日之夕散懷詠涼天居人俯黃流高城生暮烟此邦實巨鎮勢與西羌連遠庭讀殘碑繁華憶當年樓傾有遺址兔爰經壤阡訪古念今昔永歌黍篇

保德州志

卷十二 藝文下

十二

李氏三教圖

見鄉賢 李謙 字受益

名理與空寂所趨各殊塗判然若冰炭詎可同器居胡爲生同胞異彼冠巾裾九原不可作存此三笑圖

保德述懷

見名宦 周山

生長四山裏出仕山東西命名與仕所山字不曾離德州與保德予仕可不媿天意固有在造化亦如斯食祿自有方順受夫奚疑仕所繁與簡隨治予皆宜德州當衝要迎送無定期禮或一有失蠶起謗與護上人頗見愛下民無忍欺泣官幾三載守制還剡谿服闋上神京選法銓部司復除到保德正近陝西陲境土臨邊地風俗猶染彝戶編止五里地瘠民更稀人多不識字五禮懵無知婚娶惟論財准折驟馬犁顧茲風景陋言及與嗟咨於焉用夏變欲與鄒魯差遵制興社學童子纔從師教之以小學朝夕習幼儀庠生游予門講論書與詩俱知含漱趣麗澤互相資明年當大北月桂秋香時竚看奇男子攀折最高技是否知禮節恭敬恆自持耆老悉淳篤寶

介穿深衣頗有儒者風日漸去澆漓爲之及三年保德其庶幾惟願邊烽熄晏安常
忘危允樂唐虞世民物咸熙熙

黃河環帶

明榆林副總兵曹遠 雄 字定

河源發崑崙奔流漸洪大幾折經林胡環達似襟帶滔滔無倚波奇觀此其最仙槎
杳何許事謬心可會惟冀瞻一清潤及九州外

雪浪鳴雷

前人

雲濤觸崩崖雷霆終日震浩浩復湯湯如鳥爭奮迅銀山湧中流玉壘翻水陣濺沫
龍噴珠飛花目幾瞬偉哉壯雄觀麗景冠三晉 以上五言古

登保德城用蔡太常

名韻 元河東道肅政廉訪使 王思誠

天橋峽口噴黃流驚濤南遼安西樓城壞樓傾昔人去龍爭虎戰經幾秋聖朝疆域
際天末萬國風塵清六合太平民物百無虞但恨年年困冠虐我來按郡歲時更千
巖萬壑殘雪明定知來歲是豐稔雨暘時若條風清穀麥盈困蚕滿箔鄉社笙簧動

保德州志

卷十二 藝文下

十三

村落我時聞之亦欣然願與斯民同此樂

贈保德州守王公

殷夢高 字新

今之州牧古邦伯保釐元元翼天室定羌壤繡錯秦晉擁衛名藩控沙磧 帝曰疇
咨若予州特簡先生來柱石先生北海之俊英家學青箱世無匹八龍三鳳皆雁行
先生卓犖眉偏白夜郎筮仕列上考宣力巖疆更超軼蓮山聳翠見風裁帶水汪洋
知 減 澤勞心撫字六七年茹蘗飲水同一日政成樂只亦遍歌公令永從時代間刻有樂只歌民有
襦袴吏不墨誰能枉道事上官獨坐聲名過郭伋西神有客汗漫遊余鄉惠山別名西神輦下
飽聽循吏績一朝鍛尹出春明得附龍門許通籍君家庭砌多芝蘭吟燈寒映月光
碧相從剪燭話生平益聞布政多奇績竚看丹詔重下徵遍爲霖雨甦蒼赤龔黃丙
魏合一人願借長風振六翮 以上七言古

按事達保德偶成

元憲府照磨 李進文 字美君

地勢連立阜河流壯郡城坡田多畝種民粒少聊生撫字心仍重宣明政已清名堂

書牧愛正要贊昇平

登水寨

王緯 大梁人

走上觀音寺黃河山下分秦川人厄寇晉地稻連雲螭首雙碑古蟬聲兩岸聞乘風襟抱爽絕勝酒酣釀

保德山

見前周山

昔作林濤寨今為保德城定羌亡宋號附廓大金名後瞰黃河近前臨翠嶺平籠葱藹佳氣萬古屬皇明

禹廟

見前馬上錦

萬廟空山裡黃河遠故宮墻凋餘古繪庭闌滿秋蓬糧石清華老龍門道路通至今橫作塹猶藉控羌戎

族人被掠逃歸

見前王所用

日高知寇警城北望秦川匹馬臨河側驅羊入漢邊荒村人影亂遠陌劍氛鮮弱族

保德州志

卷十二 藝文下

十四

偏罹患歸來淚若泉

左師

為副將孫弘謨作

前人

隣境嚴烽堠笳聲徹夜聞風旂翻雀影荒草雜龍文白鎧搖如月青鏐斷若雲可憐忠將殞誰復樹奇勛

使旋及河

見前王劭

咸云天設險遂足限華彝有楫誰為擊亡維孰與纒廟遺嗟禹跡澤竭痛周黎獨有中流石千秋屹不移

轉壑飛流

見職名蘇東柱

一灣流水活飛雨濺青天白練光如綻瓊珠碎復聯雲回迷斷嶼澗折散空烟不意風塵日還來洗玉泉

署中雜詠

前人

絕塞長河出孤城落日懸雲崩寒立戶霧破氣交天鬼火陰山外蒿林獵鼓邊殘疆

餘對壘歲月草芊芊

其二

日對烟橫岫黃流不計年
笳聲悲積月草色濺澆田
報種無安土彈弓盡大邊
春犁蒿目恨空憶費刀篇

其三

烟氣交如霧河聲葬大淵
獨憐戎馬後偏到雨花前
戶牖懸山藿躊躇買酒錢
唐風原儉約豈爲俗纏綿

其四

莫說從前事鬚眉尚是吾
數年知夢幼中夜豈模糊
獨抱乾坤老誰憐意氣孤
河聲摧落雨雙泪滿林胡

過石梯抵十方院

見前 姜宗呂

險峻行行盡修途入望平
苻田連水濶茅屋帶沙明
野渡荒烟合山城黛色橫
勞塵

保德州志

卷十二 藝文下

十五

知暫息攬轡有餘情

釣臺漫興

見前 陳大德

問隱來磯畔新詩吐翠巒
白雲飛磗戶紅蓼點沙灘
徑滑因朝雨衣單覺暮寒
山居無個事垂釣學偷安

其二

斗室倚青嶂堪居寄傲身
雲歸山作主月上水爲隣
命酒酌詩債求魚佐食貧
莫悲生計短高臥樂天真

其三

傑閣倚巒額清幽遠俗塵
醫愁詩是藥伴醉草爲茵
忽鬱烟霞味方知山水親
食鮮常不釣隔岸問漁人

其四

幽奇收不盡剔燭尚題詩
月出魚爭躍雲歸鳥自隨
行杯求熟睡問年解攢眉
剩得

閒中趣更深許夢知

避暑十方院

見前姜榛

炎熱難過午瀟然勝地存危峯壓古寺遠水抱荒村院靜東風細鳥喧野樹繁坐深幽愜愜恣意向平原

立秋前一日登高地峻山值雨

前人

漸覺秋期至登高興已萌千山藏曲折一水繞孤城寒雨村村急金風隱隱生長途潦倒客回首不勝情

挽王節孝

博學宏詞特授翰林尤侗
字展成蘇州人

嘗觀列女傳節孝最為難已歷冰霜苦還承菽水歡持家看鹿挽教子問熊丸應樹鳥頭闕泉臺松栢寒

以上五言律詩

黃河天橋

金河東北路按察轉運使蕭貢
咸陽

鬱鬱風雲入壯懷天潢飛下碧崔嵬兩岸偈側無十步萬頃逡巡納一杯濺沫紛紛

保德州志

卷十二 藝文下

十六

跳亂雹怒濤隱隱轉晴雷曾聞電火燒魚尾會迹桃花漲水來

和中山王擴充之韵

元韵有碑在堂右壁間

孫胤期

林野霜寒秋色鮮西風行旆忽飄然休聲竟播河東郡寬德應同塞北川冤訟已知消舊日宿囚又喜得殘年奏書指日朝天闕不次登庸拜寵宣

勉賡嚴韵題安西樓

李堂
燕山人

山嵐過雨一番鮮何事登臨倍黯然俯視禹門深峽水遙看修辨後橋川

忠公集作後橋川

可人風月憐今夕好客樽疊憶昔年西夏已安無個事邊侯竚待紫泥宣

和元質安西樓韵

本州知州王嘉言

暑氣低回野色鮮凌空欄檻迥超然東南形勢隆中土西北風沙接巨川千里不驚銀夏俗一麾來自甲寅年昇平無用明邊策正要吾君德化宣

大德六年春來保德贈太守王公

元憲府吏武戢
字叔安

峻嶺重岡最盡頭孤城絕險枕黃流東遮全晉山如戟西接諸羌地似秋俗本尚純

民少訟田因歇種籽多收六年太守人難學廢事重新一一修

自興縣適保德道中

明刑部
員外郎 部天錫

道徑險阻欲消魂滿眼風塵慘晝昏兀突幾多黃土嶺蕭條三兩白沙村危磯亂石
愁罷馬老樹枯藤掛餓猿表裡山河雖勝地萬年鴻業仰天門

前題和韻

明巡按
御史 李讓

危坡陡澗嚇人魂又况邊河日已昏負月征人來野戍凌雲宿鳥下荒村愁乘峻嶺
冰朝馬憶聽深山雪夜猿大禹神功何處是天橋南去有龍門

前題和韻

明按察
司危事 邊鏞

漠漠風沙欲斷魂邊庭白晝類黃昏人家寥落依荒土軍戶凋零戍遠村幾洞花殘
閑白鹿千峯月冷嘯元猿登高翹首遙瞻望五色雲中是禁門

其二

前人

馬蹄踏雪暗消魂旅食荒涼日又昏古樹重重盤曲徑黃沙漠漠繞孤村朔風塞外

保德州志

卷十二 藝文下

十七

驚飛雁獨月簷前慘素猿試問黃河何處去韓城城下過龍門

其三

前人

愧我無能慚斷魂山溪茅塞自昏昏廿年為宦叨微祿幾度觀風過古村報國有情
追汗馬思鄉無計鎖心猿白頭未遂歸寧志惆悵慈幃日倚門

天橋雪浪

見前 陳紀

立馬天橋久俯窺黃河斷岸勢巍巍北來貫串華彝地南去分開秦晉限怒浪花飛
如噴雪驚瀾聲吼似轟雷仙家縱有乘槎事到此應知也用迴

觀黃河

見前 徐寬
字夫敬

涉水登岡到此州興來郭外一觀遊人生宦轍渾無定主上恩波豈易酌紫石巍巍
天作塹黃河滾滾氣凌秋家山萬里知何處南望凝眸轉自憂

祈雨有感

封丘
儒士 李大有

煩暑如焚稼若蒸使君憂旱籲蒼穹轟雷**皦皦**一時震甘澍淋淋四野通權涸魚龍

揚巨蠶含愁農叟轉歡容古來有感惟湯帝今日多歸太守功

自河曲過州時字來同毛那駭數為邊患

明侍郎 楊璿

陝州南去定羌城觸目風烟感客情山勢迢遙通絕漢河流屈曲遠連營居民到處
疲窮寇戍卒頻年困遠征何事元戎寶車騎不教千里一塵驚

保德卽事

明兵部侍郎 楊琚

山為城郭但增陴城下黃河勝鑿池閱武有場軍旅盛沿邊無警吏民熙俗淳事簡
官來少地冷天寒春到遲最喜斯民勤稼穡盡將岡隴作新菑

登水砦瞰河有感

見前 馬上錦

山立河心古寺幽登臨極目俯滄洲一川水漲瀾天塹兩岸波騰擁堞樓茅屋蕭蕭
荒磧外桑田渺渺舊灘頭懷襄幸不為魚鱉好辦租庸貢夏秋

古石龍鱗

前人

保德州志

卷十二 藝文下

十八

一片嶙峋鎖碧斑龍文留得傍賢關雲生石上雄蟠處雷動天中幻化間苔蘚盡消
浮瑞氣風塵不剝老蒼顏從來神物多奇迹試看南陽舊臥山

帶水泛黃

見前 崔士成

林濤古寨枕黃流一線紆迴帶遠陬花岸夾城驚虎渡銀潢入漢問槎遊太平無待
千年報潤澤何言九里仇明德禹功應不朽令人極目思悠悠

石磴梯雲

袁宏

羊腸石磴鎖莓苔坤艮元從一氣培翠壁巉岩凌遠漢黃河洶湧吼晴雷半空路轉
登臨苦絕頂雲收圖盡開萬里乾坤俱在目憑虛何必問蓬萊

轉壑飛流

前人

幽深曲澗自迴縈泉脉奔騰勢倒傾流去朝宗何浩瀚聽來入夜轉分明微風漱石
猶鳴珮驟雨傾盆若吼鯨疑是子胥經過處至今怒氣不能平

觀入衛兵渡

見前 王所用

瀕河遙望古津頭入戍征夫漫泊舟渡遠沙灣人尚病艎高浪急馬偏愁一竿赤幟
凌空渺兩岸青苗恁地蹂莫道遐陬民不穀年年原是爲防秋

黃李雙節

前人

綱常自古本難全姑婦何人能永肩誰謂數年新伉儷並完一節撫蓀荃孀闈奕世
孤燈照宗祀千秋一線牽堪嘆姜媛矢靡忒迄今猶誦栢舟篇

河變步苗都諫遊石梯樓韻

前人

納履忙登鎮朔樓驚看洪浪湧灘頭千霄古樹波中杪比舍高楹水上舟井竈翻成
魚鱉藪桑田變作雁鳧洲可憐夾岸遭昏墊二百年來此一秋

春日遊石梯門樓

見前 苗朝陽

山下黃河河上樓水光山色滿樓頭盈盈天塹華彝界緩緩人橫秦晉舟踰履穿雲
凌峭壁揮樽落日暗沙洲款閱誰復恢河套悵悵茫茫白草秋

過保德答馮大夫

前人

保德州志

卷十二 藝文下

十九

人世升沉何可量此身總不負綱常醉拋詩酒乾坤老笑弄風雲歲月長抱甕新畦
眼底緣談天舊俠夢中傷不堪七貴樓臺地斷送遊人天一方

懷水砦用馮亞元韻

前人

笑擬中流龜與鼉桃源有路喜相過四圍山色翻銀沫一線天光漾碧波古壘渡頭
悲草木元門深處拂松蘿感懷不盡登臨興忍聽舟人捉棹歌

贈保德州守高公三聘

前人

畏路乾坤此識真丹崖翠壁費招尋長風翻浪黃流近直釣爲漁大海深劔氣橫空
山色壯鶴聲嘹唳歲清高蹤已卜飛霞外自是浮名一羽輕

和苗都諫遊水砦韻

明府谷 馮夢元
亞元

孤峯水遶象靈鼉鈎引高軒幾度過峭壁巉巖堪底柱洪濤洶湧任風波喜看古寺
棲仙鶴笑閱喬松佩女蘿盡日登臨渾不厭挑燈齊和紫芝歌

前題

見前 崔士成

中流誰復叱神鼉四水縱橫抱此過澎湃濤聲驚霹靂浮沈樹影鎖烟波忘機釣叟
眠沙鷺愛寂山僧紉碧蘿人世蓬瀛何處是好邀明月醉笙歌

登保德城望黃河偶雨

明司理 王雲鷺

倚樓寂寞意如何莞爾年華屈指過風旆暫停消旅况邊城不閉喜戎和雙魚可付
殊方信一雨應添五月波自是太行隔宋國暮雲極目送長河

挽戴將軍陣亡

崇仁人 吳道南

風高虜騎踏陰山大漠塵霾暗紫關壯士不忘溝壑死忠臣何必凱歌還解圍功績
全三鎮見義心胸比二顏千載芳名如日顯昭昭留在史書間

戴夫人趙氏苦節

耀州人 王圖

蕭條青歲已稱嫠未恤鳴機爲子師執節既能閨範潔保孤尤見母儀慈廿年扃戶
甘荼苦一諾終身無改移陌上行人指華表至今雙壠頌無涯

過保德同諸君登郡署閣

保德州志

卷十二 藝文下

二十

塵沙倦眼自靡娑屐齒追隨快友過閣曉千崖吹雪氣牕晴三面眺黃河流雲乍吐
城餘樹古砌深埋戰後戈即使流漸堪返棹征途無計繫蓬科

謁孔廟步李孔德韵

關中人 宋振麟 字子振

霜流初日破前除翹首空堂杖履疎劫火何曾燒北斗棹壇不候問南車遲回立碣
寒松老點綴荒城古豆餘龍石斑斑新晉問情雲呵護魯宮書

恢復府谷

有小序

山西巡撫
東萊人 宋統殷 字獻微

保德府谷一河相望雖分疆域而安危共之屬以逆氓負固久稽天誅余竣役平
汾直抵保德數月不下之賊八日而復漫書之以記歲月時庚午仲秋二十六日
也

長河怒浪拍天開何事旌旄拂地來野色迷漫橫水陸王師震迅失風雷無端羯鼓
中宵盡有脚陽春絕域回秦晉封疆緣底事可能無意出羣才

其二

前人

萬里關河指顧間，憑欄一望戍樓殘。風迴雁影泰山曉，霜冷旄頭晉月寒。何事標銅銘廣莫，要須完璧報長安。憂天百轉孤臣慮，未許他人袖手看。

撫軍宋公恢復府谷有詩志慶次韵

見前 王 邵

兩河相對逆濤開，喜見汾陽仗鉞來。賊膽落時摧若籜，軍容赫矣疾如雷。俄傳戍堞鴟音靜，極目寒汀雁陣回。自是壯猷紓帝旰，敢煩停駟問遺才。

其三

前 人

赭服黃巾指顧間，幾回燐燹蔀廬殘。聲吞野老三川蹙，氣薄風雲一水寒。豈卹窮兵傷撫字，須從掃穴奏平安。鷲潛未是游濶鮒，正好顰眉仔細看。

越月賊果復陷河曲

喜陳繼南父母編審

前 人

目擊遺黎恫若何，溝中誰起自骸多。福星遠賁臨陬澁，朗鏡高懸炤笠簑。旃首來蘇依化日，鴻音戴好集丘阿。十年生聚從茲始，臥輒偕賡樂只歌。

挽馬烈婦

見前 蘇東柱

保德州志

卷十二 藝文下

二十一

皓月閨中得丈夫，乾坤意氣正相扶。腸枯睫赤給痴父，血漬麻衣別老姑。簾外星河驚戶動，塚頭山鬼避棺呼。酒漿灑地神靈迴，痛哭紅顏勝戟鬚。

前題和韵

見前 高 賢

井臼多年勉事夫，忍將靈柩不親扶。生悲十載無遺嗣，死恨六旬止老姑。華表歸來應有怨，杜鵑飛去血頻呼。我心時厪綱常慮，吟盡騷些泪滿鬚。

前題和韵

見前 姜宗呂

矢死羞云人盡夫，澆風何惜一身扶。茹荼苦乏懷中印，仰藥甘愚堂上姑。義激簪裾爭嘯咏，悲深猿鳥亦號呼。爲忠爲烈無殊事，愧殺悠悠似戟鬚。

前題

前 人

抱節甘枯類折筇，朱顏耻作舊時容。泪傾雪浪翻星海，氣咽長河遶翠峯。香骨埋燐縈蔓草，貞魂化鶴傍寒松。欲知憑吊無窮恨，靜夜烏啼問遠鐘。

觀音閣寓目次關中劉石生漢客韵

前 人

登臨不厭舒長眺載酒徵歌過曲堤下士使君曾夢鶴多才嘉客舊燃藜岸分秦晉
中流闊峯帶樓臺夕照低望裡荒原餘戰壘關心雲物尚淒淒

過保德詩

有小序

古沛舉人 閻爾梅 號古土山人

往讀趙世家武靈掠地至樓煩林胡心竊壯之而不識其形勝康熙辛亥過保德
始知其爲林胡黃河直掃城下隔岸皆秦之疆域去河套匪遠矣因與良思社翁
踏雪城頭四望郊圻嘆古人不可復作也遂括其大意而詠之如此時十二月之
初七日

大梁分野次旄頭歲暮緣邊矍鑠遊杖履縱橫三戰國悲歌震動五諸侯
元龜倒吸龍門峽赤豹橫眠鹿徑溝長笑因人成事者劉琨徒自老并州

其二

澹林楓樹已蕭條穴處山農帶雪樵城坐寶蓮鐘地脉河從神木駕天橋水魚味勝
鱖鯉膾石燕紋如翡翠綃深謝居停勤念客綿封霜菓餽僧寮

保德州志

卷十二 藝文下

二十二

其三

崇岡斷壑匝城根獸角崩摧半不存瘠土桑麻纔四里撓街瓦礫僅三門涔川劍賜
劉元海冀鎮兵興賀六渾抵掌醫閭山下客邊關往事夜深論

挽馬烈婦和韵三首

見前 陳大德

嬾陟高原學望夫夜臺長遊倩誰扶齊眉無伴應憐我同穴縈懷忍別姑膩骨畏邀
青月影香魂慚聽綠牕呼他年藜閣繙魚簡此日爲君斷數鬚
幻去良人獨見笻羞從粉黛覓新容自知肝北瑤池雪誰識魂棲紫蓋峰河淚未乾
驚化石秋睚欲閉厭生松燕門矢志何須問月冷空閨慟夜鐘

同諸子過西灘卽事

宣城縣 庠生 沈廷璐

冉冉平沙並轡行家家矮屋有書聲綠山雉堞高低見極浦厨烟遠近生緣樹陰濃
紅葉熟黃河浪靜白鷗輕樓煩風景西灘好笑指歸途月正明

峻嶺飛烟

州廩生 陳士宣

巍峯拱秀大河東地接闐闔淑氣通曉霧出山春寂寞暮烟吐岫月朦朧騰騰亘古
疑朝雨裊裊長空漾晚風眺罷醉還回首望謾誇身到五雲中

挽王節孝

見前 尤侗

秋風河水雁飛賒御母年來泣鹿車受性自甘荼蓼味豕顏人照雪霜花吟桐百尺
傳高節吊鶴雙行仰大家自是採徽頻結軫青山碧水浩無涯

釣臺懷舊

見前 白君琳

開山峭壁半崩隳下有當年九曲池西閣歌殘天籟響南樓舞罷夜蟾輝青娥嘖蹙
知今日黃鶴飛鳴憶昔時最是閒愁無處詰傷心偏說峴山碑

前題

前人

移家避寇闢荆榛目盡烟波笑搢紳秦嶺鳥飛喧日暮燕山龍戰泣時屯美人黃土
空招魄石馬青燐漫損神回首汾陽征戰後豪奢今古屬何人

遙同室兄陳大九日遊釣臺

前人

保德州志

卷十二 藝文下

二十三

聞君此日恣奇遊眼見繁華一瞬休白髮常添今古恨黃花不散往來愁雲中飛雁
時窺戈渚畔眠鷗獨避釣盡日柴門無剝啄科頭風急亦何憂

前題

前人

釣魚臺下釣魚舟釣罷垂竿見古丘雀啄雕梁驚客至烏喧盡棟怪人遊會憐落帽
青蛾斂遙憶風吹華髮愁獨有閉門籬畔客白衣望斷思悠悠

同州守風王澹翁遊髮臺次宋坦齋韵二

殷夢高

聞說元龍結構奇雙旌同上九層基側身鳥道天還小極目晴川水去遲此日登臨
勞杖屨當年鑄鑿費錐椎陽春有曲知難和敲斷吟鞭未得詩

破浪遙探古蹟奇釣魚臺迥剩荒基狼烟未靖千秋恨兔窟空營一死遲天險關高

愁澗壑紅羅帳冷笑權椎

經略公曾有紅羅帳裡一書生之句

河山錦繡原如畫

誰傳墮淚詩

和韵題州署賞心樓四景贈太守王公并宋垣齋二首

殷夢高

逸少才高締造雄危樓突兀破層空簷前山色涵春翠檻外雲光入夏紅紫塞秋聲

來枕席秦關冬日照屏風政成多暇宜觸詠客至何妨醉竹筒
傑閣憑城襟帶雄子京詞賦欲摩空迎人魚鳥偏多態得地烟花分外紅一目直窮
秦與晉四時不盡月和風登臨指顧逢知己共訂扁舟逐釣筒

羗署聞雁

殷夢高

何人清夜撫湘絃驚起霜禽絕可憐海外辭巢非一日衡陽歸路尚三千空教壯志
同黃鵠漫爾哀鳴學翳蟬訴盡心中無限恨南來北去動經年

重陽前一日夜雨羗署獨坐

殷夢高

辭家萬里客窮邊又值淒涼暮雨天強自拈詩頻剪燭從人索酒笑無錢惟餘破帽
羞蓬鬢豈有黃花對綺筵欲夢鄉關魂不識擁衾心折五更前

九日偕友人觀音閣登高

首句限用坡仙詩下同 殷夢高

莫負黃花九日期荒郊策馬歷嶽巖身探天際烟霞窟目極秋深澗壑姿故國友朋
時聚首時同遊宋坦齋周元助皆余同里異鄉風物慰離思憑高不用添惆悵揮涕牛山枉自痴

保州德志

卷十二 藝文下

二十四

九日太守王公晏賞心樓賦贈

殷夢高

莫負黃花九日期樓前景物媚尊彝雲涵返照浮城闕雁帶秋聲落水涯杞菊雜陳
肴並旨甄裝列坐客尤奇時有口外官在坐龍山漫自誇高會不得風流似二之

澹翁王刺史招遊釣臺懷古

崇明宋履中字坦齋

到處尋幽未出奇扁舟還向古臺基旌旗捲霧長河靜劍珮冲霄落日遲暮樹寒蟬
憐過客秋風綠酒慰荒錐百年計拙空餘蹟留與傍人作挽詩

題州署賞心樓四景兼贈澹翁老先生

中聯限用春夏秋冬四字

王粲樓高百尺雄拓窓四面勢凌空春臨野樹穿簾綠夏取明霞入酒紅拂座秋容
摩詰盡圍爐冬景黨家風山中渾似陶居士退食焚香詩滿筒

登觀音殿九日次新又殷先生韻

限坡山句為首語

莫負黃花九日期慈悲閣上最嶮巖雲深不辨龍蛇路僧老還如松鶴姿秋入東籬
情更遠人分兩地話相思君才應有逢迎者我意棲遲亦學痴

和殷先生自遣原韻

宋履中

莫負黃花九日期一枝踈影補新籬
忻逢佳節年年賞難得秋光日日羈
與世寡情忘野馬此生無恨寄清卮
吾廬天地同行客對景何愁不解頤

王父臺賞心樓四景次宋坦齋先生韻

馬雲卿字兆升

特地樓臺指顧雄踈櫺四面映晴空
春容入座茗烟碧夏日穿簾榻影紅
遠矚秋雲秦領月近睇冬景楚江風
凭欄一望情如畫客滿樽前詩滿筒

魁樓拱北

馬雲卿

文光閃爍自天開筆點青霄月正哉
一水潏迴環闕至萬山層疊抱空來
胸中錦繡驚三峽足底風雷壯九垓
翠閣凌雲朝紫極巍巍獨步擁仙才

入天門關

見前周山

一人天門關兩山似排戟攢峯擁翠螺
峻崖立赤壁老松象虬龍古栢猶蜡蜴
山鵲噪喳喳野禽鳴唧唧石縫凝水漸
路傍生荊棘馬走循獸蹄人行由鳥跡
轉灣又一

保德州志

卷十二 藝文下

二十五

灣過磧復一磧迢迢有一舍步步躡亂石
過客悉長吁行商多太息我生在浙江拜
官來保德出入必由行顧瞻實戰惕自愧
無長材揮毫書短什

五言排律

蓮山聳翠

殷夢高

佳氣浮河上山山翠色重分明太華頂
飛下玉芙蓉

帶水泛黃

前人

勢從天上落行向地中深曲折依城去
山腰亦帶金

峽口天橋

前人

峽共瞿塘險銀河捲雪濤疑因牛女渡
駟石駕長橋

水心底柱

前人

憶得江南好金焦水際浮茲峯差足擬
終古制頽流

峻嶺飛炯

前人

百丈丹崖迥常疑野火燒誰知是正氣
化作彩雲飄

溫泉騰霧

前人

玉夜滋靈氣空中素霧縈披襟思濯禊不羨古華清

龍翔遺跡

前人

何處為霖雨空餘鱗甲存飛騰還有日咫尺是龍門

燕孕奇跡

前人

簡狄吞猶剩遺踪此處留玉關知不遠萬里看封侯

以上五言絕句

黃河

見前 陳紀

攪轡黃河岸上行此心凜凜似持盈人能操省恆如此何患常行事不平

贈李野軒兄弟二首

元翰林學士 王仲謀 號秋澗

三聖元功一理同後人妄意有西東不須更剖藩籬破都在方塘論列中

德積由來慶自賒三花同秀定羌家從今沮洳汾西曲三教堂中見棣花

前題二首

元學士 陳儼 字公望

保德州志

卷十二 藝文下

二十六

兩談儒釋一談立昆季三人各自賢我恨無緣識渠輩細聽蓮榻較直傳

三人同氣不同行餘慶堂中局局新好在一門傳教處到頭公議屬何人

上石梯子山

明知州周山子 周泮

欲上雲梯上石梯石梯上盡與雲齊天街咫尺須臾到五色祥雲惹我衣

公餘暇作

見前 王瓊

山下黃河山上城河魚肥徹廓民羸羸字應作羸羸又非韻可能牧愛深於水移得肥來在此

民

蓮山聳翠

見前 周山

一脉生來發五支翠微寒削玉蓮奇夕陽雨過看還好紅閃霞光落硯池

帶水泛黃

明憲副 馮清

混混黃流震地來蜿蜒環抱亦奇哉邊城保障功尤大一穴崑崙孰始開

水心底柱

明縣尹 張席璿

一線長河峽遠岑孤縣水寨峙波心任從兩岸狂瀾倒底柱中流自古今

古石龍鱗

見前 陳嘉蓋

有龍自可興雲雨觸石何難遍海山一自靈蹤移泮後禹門相繼似連環

雪波鳴雷

明都察院司務 鄭如意

掀天激石雪山隕澎湃奔騰響作雷滾滾遠從天上落禹門驚起墊龍來

石磴梯雲

前人

疊石依山稜復稜岩嶢千尺可人登舉頭霄漢無多地身在天梯第幾層

轉壑飛漢

明按察司僉事蕭山人 來天球

出壑源淵據上游跳珠迸玉滿川流莫教只載蓮舟樂須灌南郊待有秋

禱雨有應

見前 王所用

瀕河斜日雨來山石磴陰陰草色斑為謝主人虔對越積裡飛入五雲間

挽戴將軍戰歿

定興人 張棟

保德州志

卷十二 藝文下

二十七

匈奴十萬寇邊城赴敵捐軀一羽輕死事封疆臣節在將軍芳躅繼真卿

戴夫人趙氏苦節

前人

親收戰骨付新阡茹蘖深閨二十年俯仰那堪心力竭國風重詠柏舟篇

遊花佛寺

見前 陳大德

本來面目還誰識點染丹青竟不同色即是空空是色堪憐枉費一番工

讀姜都督傳二首

見前 白君琳

當年專閫是何人誰識將軍社稷臣萬古只應留節烈千秋衰柳不成春

忠孝君家萃一門朱衣贏得在兒孫當年還吝千金賞不道天心賞正繁

石梯冒雪

見前 馬雲卿

危梯凝斷凍雲連六出風迴接地天囑咐行人須穩步如今世路不同前

題花佛寺

失名

石佛巍巍出世初由來傳誦說公輸畫工何事污顏色可恨當時面目無

以上七言絕句

補遺

月夜訪新又殷先生不值對花有懷

宋履中

強欲排情漫撥弦閉門訪戴袖吟鞭剡溪月印蒼苔潤中散風生酒甕前剪燭懷人
憐夜短製箋思雁寄籬邊途窮不敢詩肩聳恐惹黃花笑我顛

己丑秋客羌署有感 五言古

釣鰲海上來十載眼花白世事如碁布下手著不得羌城一夜秋寒署只反側年馳
力不與按劍盼四塞堂堂一野人平生媿積德假令務絕塵敲鍾念彌勒

冰魚吟

長河凍合魚在泥指脫層冰難覓一去年徭重袴無著今年捕急兒無質供得官家
口滑脂塵封甌釜嗟懸室肥酥勝雪不自嘗招朋誇美會良集醉臥堆紅繼蘭燭醒
時還傍佳人瑟君不見敲撲聲中態萬千肉飛魂絕天應泣

句雖粗率情見於詞錄諸緒
尾屬望仁人君子共惕焉

保德州志

卷十二 藝文下

二十八

登峻嶺望飛煙作

袁海

攬勝停驂亂石行擁茅時見燎煙生常苗氣焰冲霄漢不作炎涼類世情謾道寒岩
無自煥須知奇槩寔殊平徘徊此地思何限別着看山隻眼睛

題節婦吳氏

袁海

纔離姆教宿霜檐至節天生苦亦甘非我渺聞驚創事從誰苛論有遺慙孤鸞不羨
雙棲燕燭雁堪羞比翼鶼吊影年華容易過蓮山河水永相參

吊孝廉徐夫子

袁海

涕湧雙泉淚雨霏泰山梁木失瞻依三場未畢十年志一第空留千載歎風月宛然
函丈在衣冠倏爾夢魂微鴛駘迷路任岐步翹首南郊望鶴飛

詩餘

定羌春日感懷 調春雲怨

見前 殷夢高

春歸已半記故園當日蘭馨梅綻杏臉柳眉桃靨更共引東風撩亂新漲拖藍香塵

碾綠看畫船雕輦爭挽結伴攜筇提壺沽酒聽黃鸝聲喚到今來異鄉孤館但荒烟
滿目驚砂撲面漫捲珠簾待雙燕碧冷紅銷便萋萋芳草何曾見地角天涯日長人
倦腸斷舊時懽晏

歌

勸民歌

勸爾民孝父母三年養育心最苦不孝何如鴉反哺
勸爾民和兄弟父母生來本一氣同氣不和非人類
勸爾民勿好酒貪酒之人最可醜破家傷生不如狗
勸爾民勿刁頑大事小事莫告官會打官詞也使錢
勸爾民勿奸頑秋糧夏稅早完官官差不來雞犬安
歡爾民勿爲盜盜賊之人天必報家破身亡鄉里笑
勸爾民勿賭博輸贏未定終是錯立見此輩家瀟索

保德州志

卷十二 藝文下

二十九

勸爾民勿好鬪傷人抵命天天壽總有皇恩也難宥
勸爾民睦鄉里富莫欺人勢莫倚愛老憐貧卽君子
勸爾民勿流亡棄祖離宗情可傷生作逃民葬他鄉
勸爾民勤耕鑿莫飲酒莫賭博毋以富吞貧毋以強凌弱年年兩稅早完官卒隸不
來滋敲朴事父母以孝教子弟以學和以睦鄉里忍以息爭奪莫跳井以自溺莫懸
梁而自縛一朝之忿亡其身數口之家何所托人子於親喪有無隨厚薄所當盡其
心衣衾與棺槨無使土侵膚便是安樂國孝弟通神明俯仰無愧怍過此復何言太
平有真樂

懷舊三歌併序

萬曆壬子春蜀仁懷令王所用書於慎思軒

余方垂髫獲友於馬崔李三伯子馬長余七齡崔於余次之李又次之始締三益
之交既聯三姓之好敷衽論心翩翩然有以各得也歲癸巳余應制上春官甲午
庚子崔與李相繼登賢書而馬於戊戌次且移牒入成均甲辰崔乃登楊守勤榜

出身尋丁內外艱丁未夏余膺百里之命入蜀南郊祖餞含淚而別不兩稔間馬伯子之變今爲戚然刺心不啻傷故知且哀余仲任之失瞻也旋一□李伯子容易水矣又一禩崔伯子稱上古矣嗟乎傷哉哲人淪亡何天奪之速哉計閱世之算馬得知命之二崔得不惑之九李得不惑之三余聞而哭之慟不安枕帖廣者月餘因揮淚而作懷舊之三歌

其一

馬諱上錦字在中別號星河

維彼良駒產自神窪房星列於華殿上襄介乎天駟飛黃追軒后之乘赤文拓后唐之家鳴八鸞於交衝過五都而登踏方其嬰耳植髮逸倫絕塵馳驅迅於滅沒驍騰捷於超羣或汗溝而走血或跳澗而凌空或垂韁而報主或啣枚而奏功伯樂見而心敬九方仰而推崇跨中州之駿迹軼神陸之豪踪跣地者望之惕息敗轅者見之魂驚宜其倪影高鳴昂首通都出護警蹕入服金組載清皇路允張我武歷燕臺而市駿奏華鼓以驤猷胡爲乎駢首伏櫪泛駕九秋雲錦黯黹而無光中黃虺隤而鮮

保德州志

卷十二 藝文下

三十

儔彼駑騎兮且顛蹶若跛蹇兮咸諉諛抑孰知夫齧蹠者之善走而亦難爲人悅余將長馬之長兮而今已矣余將白馬之白兮而不可復識心哀哀兮其何以自適

其二

維彼南山何巍巍兮維此西潢何瀾瀾兮旣面之而可陟復臨之而可挹曩濯濯而枯林時委翳而低徊亦涓涓而始流且浙瀝以霏微斧斤入焉而日削牛羊牧焉而日籜旣礪确於踳躒或茅塞於山廓挹注難以濬導泉竭何以自澤忽陰雨之漫衍將淤塞乎沙漠嘗埒焉而栽植輒壘土而爲基間窮源以溯流亦尋派而指歸伊摧高而爲平咸俯首而低眉憶水源而思本乃心曠而神怡一旦雲興陶蒸上與天高涓涓不絕流爲江河蒼兮蔚兮南山來朝日新又新湯盤沐膏鄧林之木不種而扶搖鬻沸之泉無源而興濤或排山而就下或搏躍而過潁感人情之嶮巖嘆山川之消長宜其高高兮上據無極之巔淵淵兮下泓不測之漭胡爲乎泰山頽兮梁木傾原泉涸兮奚所概念彼土壤一簣之塊惟彼細流一勺之派夫誰讓而誰擇又何廣

而何隘心哀哀兮其何以自泰

其三

維彼御菌果珍玉皇郁郁離離含英吐芳綻玉舒金噴素飄黃並櫻莢以呈美軼蟠
桃而爭香承甘露以結葢凝芳潤以生漿或沔椒塗或布蘅薄眾靈雜遝命儔訴合
嘆匏瓜之無匹咏標梅之籜落爾獨蔭屋穿林長楊映沼不言成蹊蓊鬱敷好張公
進大谷之梨周文獻弱枝之棗梁侯來烏裊之柿房陵集朱仲之姣三桃列櫻胡之
別二奈曜丹白之藻石榴蒲桃之珍磊落蔓衍乎在茆檜杏郁棣之屬繁縈萃聚乎
在表宜其入公門奏金闕琳琅煌煌燦燦玉露含香向陽生節何乃棄於井上
過半垂屑木葉拜而隕枝風蕭瑟而霰雪於陵仲子抱匡廬而哽咽環堵毋妻撫孤
帷而恻切堂帘戢景篋投腔甜桃倏而作苦長筵胡由進觴余方興慨於碩菓奚
復得御以同堂心哀哀兮其何以不忘

其亂曰悲夫星歷次以拱辰河歷水以成渡山積佳而新歸潢衍水而啓胃慨何人

保德州志

卷十二 藝文下

三十一

之履泰又何斯之初度世閱人而常賒人閱世而行暮人何世之能常世何人之能
舊吾將順天地之大德優游以任造化之大數

勸民正俗歌

見職名 高起鳳

孝順父母

欲把親恩數一迴天高地厚一般推總能數盡青絲髮只有親恩數不來
恩大如天不可當請君終日自思量若還不信親恩大君是如何痛令郎

尊敬長上

騎馬如逢長上來莫粧不見把頭歪滾鞍下馬旁邊立送過方纔上馬回
傲氣雄心不肯休好言相勸反成讐如今尊長包容你自有仇人在後頭

和睦鄉里

富足人家你不知手中也有斷銀時莫因緩急難相借就與親朋反面皮
他鄉一見故鄉人喜地歡天分外親反在鄉邦如陌路不知他是什麼心

教訓子孫

萬戶千門各有途子孫資質有賢愚耕田未必無收穫休只勞勞靠讀書
若還定要子成名砍下黃荆五六根前後書房都擺列莫教虛度半時辰
各安生理

不消說聲我無田挑水何曾不賺錢就是篋頭修脚者也能積鈔過時年
富貴窮通有命存自從生下到如今若教奸巧能求富世上良民盡嗑風
毋作非爲

到處奔忙走不休一腔肝膽大如牛如何起滅都憑你只恐災來不自由
酒肉賓朋擺擺開果然鬪動半邊街試看那夥兄和弟犯法誰人肯救來
兄弟

並蒂連根生下來如何分別有形骸要知打虎須兄弟莫爲錢財拆散開
婦道

保德州志

卷十二 藝文下

三十二

誰家媳婦大如天不受公婆半句言你不敬婆誰敬你不宜做與後人看

妻道

入得夫門上下分翁姑當孝敬夫君三從四德牢須記內助還宜儉又勤

妯娌

撇開姊妹到婆邊妯娌雙雙做一團就是同胞親姊妹豈宜分作外人看

婢僕

走到前房說後房搬來撇去嘴噲噲不知他是何緣故攪得人家是醬缸

賦

雨賦

馬上錦

惟茲滂沱之澤實爲玄冥之精菑畚望而成實重糝待以敷榮黻黷妻祁不崇朝而
流遍紉編震霖將樂歲以登亨故須三日一降斯能百室有盈頃者黻黷作厲神魃
爲虐金石流火溝澮皆涸朱明熾焰以炎炎縫泰潛形而濯濯於是赴桑林之野號

雲漢之章履靈星之壇祝羽山之祊以祀以享修救修禳俄而同雲合狂霧伏曜靈收月離畢初漸瀝以空濛忽濟騰而淋漓過深林兮濯枝溜虛檐兮洛轟驟睹之灑灑乎若濤珠浪滴之灑長空徐觀之颯颯乎若玉屑瑤花之飛大麓爾其澤潤九埏液津三徑經阡陌而破塊無聲越林巒而淋鈴相應或淹東山之歸程或阻采薇之戍聘天棘颺以如絲葉珠垂而生靚疾而黯徐而淡烟光與水氣浮沉遠而濛遠而濃樹色共山容寂靜其盛也一泄如注萬壑爭流既瀾漫於平野亦泱泱於山坵漲源頭之活水鎖雲中之高樓石鯨吼而轟轟商羊舞而颺颺渺不分乎雲泥恍不辨乎岩洲則見百獸潛形萬鳥投林添金谷梁園之翠洗邯鄲即墨之塵四望暝兮無迹萬象倏兮更新聽轆轤之罷響知桔槔之停浸楹礎問而滑滑喜亭名而欣欣慶奄觀乎有秋無缺望於三春九賦胥克夫天府八口共飽乎編氓美哉利也既優既渥既霑既足豁焉晴霽雲開日出憑高視之萬靈沃沃

九日登高賦

王邵

保德州志

卷十二 藝文下

三十三

緊龍沙之澄景撰鳳嶺之清遊凌罡風而振袂御灑氣以經丘神軒軒兮霞舉思浩浩兮雲流仰立穹之晶碧撫黃輿之嶽崎景無美而不集物無觸而不奇於是桂樹詞人蓬山仙步挂四愁於嶺岫錫十賁於澗谷羅萬象以盪胸極九鴻而縱目爾乃霜滿烟乎巒紫波清阜禽流響候鳥悽聲楓搖丹而似醉柳怯露以如醒畫角吹長榆之塞錦機縈碎葉之城紉扇却兮其萎長門靜兮苔生黃金盡兮西旅玉顏去兮北庭於斯時也起沆寥之幽感動惻切之間情若夫飛駿睇以遐矚蕩遠眸以曠覽透空濛而舒眺紛垣野而可判則有雄都傑麗佳氣鬱葱雲浮鵙鵲月射盧龍結客標華陽之館談天峙碣石之宮爽氣朝來兮笏堪拄靈文扃闕兮石尚封攬榮光於河濟賓旭色於燭龍於斯時也興憑吊之遠想發逸宕之雄風別見堪崇崇闕棧室懸磯星壇斗域紺殿立岬繡錯林立詭異參差食聖神之功德委黔庶之膏脂空侈長房之術誰賡韋綬之詞於斯時也思參軍之肆傲師太傅之陳規既而廣莫揚沙斷山脚日卉木風摧川原霧織慄慄兮游履之高寒愴愴兮帝座之呼吸遂乃窮幽

奇於鳥道寄脩散於虹梁含霞納翠咀陰吐陽捫星躡漢步霄軼坱招汗漫於九垓
獨立乎太虛之上嗟色界之愜促嘆流光之蒼莽耳目移而起越形氣化而空朗
等萬仞於一拳擬咫尺夫崑崙命蓐收而導之驂金飆以孤往信溷濁之堪遺何全
茸之足網

麟賦

劉祖舜

皇帝龍飛二十四年孟冬時傳蔚州屬邑廣靈之劉樂瞳產麟舜館于蔚州甫三月
侍側寒松堂大司寇公就而視之真麟也爰作賦以誌瑞其辭曰皇初肇象品
物咸亨聖帝繼統庶彙番榮是以循蜚疏仡之世爰有龍師鳥紀之名河擁神
馬卦爻出洛顯靈龜疇範呈莫不人享康樂天挺奇英虞帝封濬十二和召舞
獸而民式阜成周家世年八百慶兆白鯉而基奠永清今 上宵衣旰食禮備
樂明驅封豕戢社鼯斷鑿齒截長鯨並日月銷甲兵配天地致昇平廣風教遍
寰瀛昭義問霑仁聲海波不揚隴畝無驚是宜聽阿閣之巢鳴畜四靈以爲禎

保德州志

卷十二 藝文下

三十四

者也於是祥雲捧日重譯輸誠遂有關雎之應涵育仁厚之麟爾乃紅絲炎炎
碧甲鱗鱗廣額直耳玉趾朱唇拂綠毫于牛尾裂錦片於麕身隱角端之高肉
異天馬之絕塵爲三百六十毛蟲之長來上元甲子泰運之辰重占繡紱之繫
再吐水精之神髣髴成康之郊藪而隱現依稀軒轅之苑囿而逡巡在孕而雷
轟霧起甫生而月朗霞蒸于時遠峰增翠深谷逢春光浮冀野清映壺濱冬草
不凋紫塞風醇童叟皆喜遠邇含嘖識者憐其不乳君子見其可親雖未擇土
而踐位平而處步中規今行中矩居不羣今行不旅鳴曰游聖與歸昌音中黃
鐘並大呂自當龜龍鸞鳳而同儔抑豈虎豹麋鹿之可侶若夫考循良之治功
詢延陵之士女羨一介之冰心頌萬民之慈母偉烈雄騰浩氣遐舉因而採風
靜塵沙之擾榮觀來堵墻之奇撫摩者日昭昭之體歌咏者日詵詵之詩遂駢
言而作賦或集字以成辭觀雲中之佳氣瞻大造之垂儀辨頂上之錦字展斯
文之在茲所以葩經十五國風以歌于始春秋二百四十二年以紀于終今且

開北嶽景兆九宮祝

皇朝之德政仰 天子之睿聰其真孔邇之化洽乃躋雍熙之邳隆事嗣徽音於典册道契太始干鴻濛

聖主當陽萬國朝宗文德武功並重千古故年穀順成黎民安樂邊隅僻壤遂產祥

麟 國之瑞也地之靈也官此一方者之福也述菴在蔚作賦紀之爲此麟開

生面矣 寒松老人識

